

**PEMBERITAHUAN PERTANYAAN DEWAN RAKYAT**

**PERTANYAAN : BUKAN LISAN**

**DARIPADA : YB DATUK JUSLIE BIN AJIROL  
[ LIBARAN ]**

**SOALAN : 153**

**YB Datuk Juslie bin Ajirol [ Libaran ]** minta **PERDANA MENTERI** menyatakan program-program yang telah dilaksanakan oleh Agensi Pengurusan Bencana Negara (NADMA) sejak ditubuhkan pada 28 September 2015 lalu.

**JAWAPAN: YB DATO' SERI DR. SHAHIDAN BIN KASSIM**  
**MENTERI DI JABATAN PERDANA MENTERI**

Tuan Yang di-Pertua,

Penubuhan Agensi Pengurusan Bencana Negara, Jabatan Perdana Menteri (NADMA) telah berkuatkuasa pada 1 Oktober 2015 bagi memperkemaskan struktur pengurusan bencana negara serta mewujudkan sinergi antara agensi-agensi yang terlibat dalam pengurusan bencana. NADMA mengambil alih peranan Majlis Keselamatan Negara, Jabatan Perdana Menteri (MKN) sebagai agensi peneraju (National Focal Point) dalam pengurusan bencana negara di peringkat ASEAN, rantau Asia dan seluruh dunia.

Sejak penubahannya, NADMA telah melaksanakan program-program bagi memastikan koordinasi antara agensi-agensi penyelamat di seluruh negara terselaras dan dalam masa yang sama meningkatkan kesedaran risiko bencana di peringkat komuniti dan masyarakat. Pada 2 Mac 2016, NADMA telah melaksanakan program *Tabletop Exercise* Empangan Bakun (TTX Bakun) di Sarawak. Antara objektif penganjuran program ini adalah untuk memperlengkap dan menyiapiagakan pihak pengendali empangan, agensi-agensi penyelamat, bantuan dan pemulihan dengan prosedur tetap operasi bencana.

Selain daripada itu, pada 16 dan 17 April 2016 yang lalu, NADMA dengan kerjasama Jabatan Meteorologi Malaysia (MetMalaysia) dan Pejabat Daerah Lahad Datu telah menganjurkan Program Kesedaran Awam dan *Tabletop Exercise* Bencana Gempa Bumi di Lahad Datu. Program ini bertujuan memperkasakan tahap kesedaran awam terhadap tindakan yang perlu dilakukan jika berdepan ancaman gempa bumi di

samping memastikan kesiapsiagaan dan koordinasi di antara agensi terselaras.

Tuan Yang di-Pertua,

Sebagai persediaan menghadapi monsun timur laut dan sebarang kemungkinan yang akan berlakunya lagi banjir besar di Pantai Timur Semenanjung Malaysia, NADMA telah mengambil langkah proaktif dengan menganjurkan Program *Tabletop Exercise* dan *Command Post Exercise* Bencana Banjir Zon Pantai Timur pada 1 dan 2 Ogos 2016 bertempat di Batalion 8 Pasukan Gerakan Am, Pengkalan Chepa, Kelantan. Program ini membabitkan agensi-agensi yang terlibat dengan pengurusan bencana serta pentadbiran peringkat negeri, jajahan dan daerah dari Kelantan. Program ini memperjelaskan kepada peserta mengenai dasar, garis panduan dan peraturan sedia ada dalam pengendalian situasi bencana. Selain daripada itu terdapat juga sesi perbincangan mengenai senario bencana serta tindakan agensi mengikut bidang tugas masing-masing.

NADMA juga dengan kerjasama MetMalaysia dan Jawatankuasa Pengurusan Bencana Negeri Kedah telah mengadakan Program *Tabletop Exercise* Langkawi bersempena dengan '*Indian Ocean Tsunami Wave Exercise 2016*' (IOWAVE16) anjuran Pertubuhan Pendidikan, Saintifik dan Kebudayaan Pertubuhan Bangsa Bersatu (UNESCO). Program yang diadakan pada 7 September 2016 ini bertujuan untuk memantapkan kesiapsiagaan agensi pengurusan menghadapi bencana tsunami menjamin keselamatan penduduk sekiranya berlaku lagi kejadian bencana tsunami.

Tuan Yang di-Pertua,

Sempena dengan sambutan Bulan Kesiapsiagaan Nasional pada bulan ini, NADMA telah menganjurkan Program Kesedaran Awam Menghadapi Bencana bertempat di Gua Musang, Kelantan pada 10 Oktober 2016 lepas. Antara aktiviti-aktiviti yang dijalankan semasa program adalah forum pengurusan bencana, bengkel pengurusan bencana komuniti dan pembentangan kumpulan oleh penduduk setempat. Selain daripada itu jabatan serta agensi terlibat turut menyediakan pameran serta mengadakan simulasi mencari dan menyelamatkan di Sungai Galas.

NADMA akan terus berusaha menganjurkan program-program kesedaran dan kesiapsiagaan bagi menghadapi bencana dan memberi fokus kepada penerapan budaya kesiapsiagaan dan pengurangan risiko bencana di kalangan rakyat bersama pihak Kerajaan dan pertubuhan bukan Kerajaan serta lain-lain organisasi yang berkaitan.